

國朝書獻類徵初編卷二百十七目錄

守令三

吳穎

田起龍

程可則

張先基

陳維國

田緒宗

李嶠

耿應斗

塗騰茂

劉兆龍

楊震生
蔣亨

龔之怡
鄭世培

于作霖

劉濟寬

閻文燦

吳綺

許定升

張學曾

張錫懌

楊端本

黃維祺

周令樹

李鼎徵

李蕃

歐陽始亨

于琨

石鯨

補錄

耿應斗

李勳

李勳

郭大基

郭大基

吳應

田漢

安令三

四庫全書總目卷一百一十五

國朝耆獻類徵初編卷二百十七

通奉大夫前署江西巡撫江西布政使司布政使湘陰李桓輯

守令三

吳穎

故潮州知府溧陽吳君卒數年將葬於某山之阡使來徵銘余嘗
官比部爲同舍郎初見不煦煦久而逾篤知其君子人也君諱穎
字見末別號蘭雪順治壬辰擢進士高第授刑部主事歷遷郎中
會帝求直言詔許七品以上官得無隱君疏言刑獄至重律無
正條者毋得刻深以意傳法其初詞旣具毋復株引滋它蔓帝
頗采用其言命恤刑福建凡五月不刑一人曰吾以恤來也爰

書末減者千餘人御史李某以多失出疏論覆視無它得不坐出知潮州潮西山曰五指石者故藪賊置兵三千更戍民苦爲兵役且奪廬舍君請減其半又畫策別建營房民始有甯宇潮屬邑皆駐兵而兵餉輸府以給蓋利其羨也君請令餉就縣支不復輸府兵皆稱便閒以農隙脩學宮及饒平壩韓文公祠月朔課諸生拔其高等士多藉成就君秉性和平而勇於爲善嘗視推官獄案固爭出死罪三人會歲凶請免大埔所屯糧宿逋數百石持之力失司計者懼是年癸卯從內大臣及督撫中丞巡視海上中寒疾投劾自免適舉計吏典遂注病歸逾十六年卒於康熙戊午二月六日年七十九矣君初爲諸生治經藝好奇見黜於學使葉氏葉聞

人也君使閩葉氏子有懼心顧遇之加厚人以爲長者少與同邑
陳公名夏友善及通籍陳已當國君視之如布衣時所與論詩推
高淳邢昉孟貞江甯顧夢游與治最舊皆窮交及在比部號多詩
人君最爲老宿當其援翰命篇清真澹逸視它人所爲工者不顧
也然亦絕口譏訶晚築西疇草堂日有吟課一時碑版撰記多出
其手有蓴羹堂集溧詩選等書百餘卷行世未刻者尙十餘種其
先家吳中由楓村徙溧陽爲處士治之三傳爲奉政大夫士衡又
五傳爲君考 贈朝議大夫心齋君配曰虞恭人先七年卒有子
四人嘉稷邑庠生嘉穗恩貢生並考職將授官嘉稔例監生大臨
己酉武舉人女二長適史棟次適狄翼經並文學孫曾男女三十

餘人可謂蕃已銘曰

宦亡巧名亡競才冠諸曹仕終一郡拂衣蕭然貧矣非病何以報
之壽考終令其文旣豐不戚其窮瀨水之裔白雲溶溶曳杖相羊
或在其中

右墓誌銘施閨章撰

田起龍

公諱起龍字雲從處士諱有年季子也公爲人端方孤介嚴取與周旋進退皆有程度雖倉卒不少變然性長厚能容人過不爲刻覈之行尤樂與人講說經學貧居時課授生徒每至理欲天人之界反覆開導如數廚中醯醬令聽者悚然門弟子以舉子業來問者公必曰理至文自精妙聖賢心傳隨在可見賢輩勿徒視爲敲門甄瓦也以此邑中名士多從公學彬彬濟濟一時有河汾遺風焉乙酉舉孝廉壬辰成進士筮仕松陽縣令松陽故山邑又值兵革後多積弊夙逋公至剔刷整頓庶務釐然一新有巨盜小魏者招納亡命爲數百里害公廉知以計擒之小魏以金三千賂公求

免公固卻之曰吾安需此不義物使遠邇赤子世世受荼毒哉卒
正其罪先是松陽無城郭多山寇不得不置防兵以是民苦寇又
苦防兵騷擾蹂躪無甯日公下車捐俸金募丁壯揆度地形築城
且躬負畚暴風日中爲倡率不旬月訖功城成因選敢死士日訓
練合兵勦寇寇息公請於督撫遂撤兵去民安堵焉政事之暇公
親進諸生耳提面命倡明伊洛正學一如里中課授日丁酉分校
浙閩鄉試典試者率以庸淺之文入彀私意謂可得年少士以故
公所薦者多不合公獨嘆曰文不論佳否而第揣摩年齒是豈童
子科哉大負朝廷遴才意力爭之及拆糊名公所得六人鄭濂
范裡徐孺芳朱雲滕達陳震先悉一時知名士也其卓識如此公

莅任三年文教政治嘖嘖兩浙稱最 朝廷將因督撫之薦內召公會公卒時年六十士論惜之處士公早卒公事母高氏以孝聞母病左右湯藥無倦容夜則立寢門外陰探安否行不聞履聲至愈乃已仲兄貧公讓產與同爨伯兄遇公至無狀嘗於市井稠眾中毀衣辱公人不能堪公默受之色愈恭人以是多爲公難之士寇王廷溫明季據汝陽寨寨中人有負公舊逋者公遭亂貧甚往以遜言求之廷溫在旁苦挫辱公且欲置公於死其人不忍婉轉開釋之公得遁去及公舉進士適邑令緝明末土寇之爲害於里閭者皆棒殺之而廷溫大懼託公親友踵公門叩頭百餘乞殘生公笑而不問至今父老尚傳之謂公眞宰相度量云

李來章曰余家與公世爲婚姻故述公行事者多且詳嘗聞族之
長老者曰當崇禎末歲屢凶盜賊蜂起士皆改業爲生計方得延
殘喘公喪家貧至無以炊又不能他有爲一時乘機得志者多公
平日把臂友然於公落寞不省顧反加譏誚者屢屢矣及公貴遇
之益厚無芥蒂於中有事不難以身任之力爲昭雪如公其人者
無論今人卽求之古人中蓋亦鮮矣公同年友學士余公恂嘗誌
公墓得其梗槩而已於公厚德事多未詳予爲撫其隱行以遺後
世俾輶軒之使有所採擇云

右傳李來章撰

程可則

程可則字周量一字彥揆又字湟溱號石臞廣東南海縣人順治九年會試第一以磨勘不得與殿試而可則益沈酣經史庚子春應閣試授內閣撰文中書尋改內祕書院辛丑齋 詔頒賜山東己酉以戶部主事分校北闈晉員外郎督理右翼倉務公慎稱職辛亥升兵部職方郎中奉 命副往山西勘問總兵趙良棟白其冤癸丑出知桂林府會檄撤藩部歸京師百務紛拏可則以敏幹稱尋卒於任可則詩文名世與劉體仁汪琬王士禎齊名著有海日堂集遙集樓草萍花草

石廣東通志張維屏錄

[illegible]

張先基

棗強令張君鞠庵之起家進士也出蔚州魏敏果公之門魏公累
官至九卿余壬戌解褐見公大司寇邸第公知余廣濟人執手問
鞠庵家言已而歎蓋追念鞠庵才可大用而惜其用之未究也當
是時鞠庵下世已六年到於今又十六年矣君諱先基字開有鞠
庵之字蓋登第後念母劉太君不待養志感云武穴之有張氏世
居月塘酈道元注經所謂刊水右對馬頭岸也鞠庵大父維楫縣
諸生父封文林郎念川亦以諸生老刻詩名念川集念川五男
子鞠庵行二年十八受知太守靈臺許君時龔端毅公令蘄水太
守延之雪堂得鞠庵卷稱善明年試補學官弟子順治丙戌舉於

鄉己丑舉於禮部壬辰對策成進士乙未除知棗強縣棗強畿南
大縣也魏公爲文祖之知其任繁劇無難然是時郡縣有司往往
爲逃人望誤魏公心竊以爲憂鞠庵下車則緝衙蠹緩逋徵嚴保
甲驅游惰庀材修學發廩賑饑月聚父老子弟讀法縣乃大治有
故官楚藩右轄者子若孫爭蔭訟久轆轤宵人窟穴其間互勝負
案積寸許上官屬新令割割鞠庵鞠訊時訓諭悱惻兩造感悟訟
乃平先是縣獄大辟凡二十有八案丹書已定鞠庵愀然有平反
意會卹刑使者行部輒條上請讞報可減等論存活百數縣故
浩穰而人未知學鞠庵開衙齋檄生童都就課於諸生中得宋師
祁童子中得鄭司直端張殿揚鄭穉王恤已而庶常學使令長冠

蓋相望棗強之有人物自是始也治行優異紀錄加級籍籍考功
魏公聞大喜居亡何而有逃人王應水之事應水匿棗強久前令
弗察也鞠庵乃坐是落職縣人傷之樹旛擊登聞鼓言狀然格於
督捕成例竟解任魏公歎曰已矣抑命也夫鞠庵脂車南歸歸而
念川方七十奉觴上壽愉愉如也母兄前基弟福基後母弟旣基
元基友愛無間拊從子之孤者鳴貢肅如已出肅天遺孤又拊焉
族有老而獨者存養歿葬殯其力乃已祖墓田以次經營漸有緒
歲大無輸國粟以爲鄉人倡按察使郡縣大夫翕然稱張君長者
旣基餽於庠歲貢上春官他所濡染成就者甚眾鄭司直由庶常
歷湖南按察使陟江南布政使道月塘步屨瓣香及階瞻遺像雨

泣且曰棗強縣志殺青矣敢告我先師於九京又曰曩丙申元夕
大將軍兵過棗強兵與民格鬪而死大將軍譴怒令禍且不測有
趙大者脫走踰二百里忽詣軍門自首曰殺旗丁者我也令無罪
大將軍乃械繫趙大去嗚呼人情莫不自重其死也而趙大慨
赴之師之感人古循吏所未嘗有哉余聞是言也而愍然久之曰
若鞠庵者沒世而名稱矣鞠庵襟期散朗與從兄寶持孝廉酣飲
長嘯披裘岸幘有魏晉人風然雅好購書插架萬卷閣藏焉縣人
之請祀鄉賢則具列其內行也初多女子少男子已感夢而產晉
金年四十四矣輕財好施與孝友有父風甫踰壯而已四丈夫子
繩繩方未有艾棗強雖未大用於世而世澤於是乎遠矣